

童山詩集
四



童山詩集

(四)

李調元撰

童山詩集卷二十二

己亥

遊惠州棲禪寺并序

正月初六日。惠州試畢。率諸生葉芳。陳應元。楊炳奎。廖飛彰偕遊。分韻得雲字。
春光澹蕩水清芬。蘇老風流孰與羣。依舊折蔬煩太守。誰言種樹少叅軍。木棉映日翻紅錦。芳草迎風妬綠裙。漫向六如亭上望。朝雲偈語不堪聞。

登白鶴峯

洞潭碣岸抱城坳。白鶴遺居碧蘚交。此地空謀百尺井。當年尙憶九重巢。山如蜀道眞堪寄。湖似杭州未忍拋。不是行旌催太速。黑雲飛雨遍江郊。

陽春舟中望崆峒巖

曉至陽春縣。臥看山過牖。起來問崆峒。乃知近可肘。奇峯插天虛。洞府穿地厚。峭非人工削。破是神斧剖。瘦疑古藤纏。膚無寸土受。鎮壓梅嶺南。雄跨羅浮右。舟中二三子。謁我塵初抖。喜其皆遠來。頗以慰老朽。便與細論詩。敢謂循循誘。惆悵不得登。遙酌一杯酒。

山行四絕句

乍聞橘蕊香。已入空山裏。一樹白如雪。繁星落江水。
古藤纏破屋。佛像半莓苔。野寺無人到。山猿偶一來。
崦外有人家。犬吠聲如豹。不敢出簷門。隔離窺客到。
老農六十餘。手倚樹爲杖。自言筋力强。一日山十上。

宿陽江縣太平館中作館舊爲書院

解衣暫抖馬蹄塵。乍見蕉窗一色新。日上扶桑方吐豔。雨餘勒竹已成筠。久聞海近無貧戶。卻喜山深有秀民。休再寓人致薪毀。殷勤爲勸後來人。

題熱水池和高廉觀察奇麗川豐額題壁元韻二首一五律一七律

粵東原熱地。更以熱名池。濯去陰陽混。探來善惡知。二巾疑火浣。一屋似烟炊。惟有熱腸客。偏留執熱詩。
雞舌同含憶舊香。天南復共瘴炎方。平生原不因人熱。此水偏如對我涼。蕭寺來時鴉滿樹。小亭立處月依裳。知君浴罷方歸詠。孺子羣歌濯足浪。

題高廉觀察奇麗川小照二首

奇士多奇想。胷中別有天。仁風披一卷。明月印千川。竹葉千杯少。楊枝百步穿。晚來窗下坐。猶誦小倉編。
好簡齋詩。

文章春榜首。政事白雲司。人到蠻烟靖。天看瘴霧披。愛民今宋璟。佐治古辛毗。展畫如相晤。誰言室遠而。道署與試院逼近。時麗川在省。故云。

題茂名閣蘆溪課子圖二首

雙梧百尺碧森森。中有書聲似鼓琴。想見一經親課子。滿籬不肯羨黃金。雙雙合璧氣如虹。珠樹誰言未許同。昨日又傳湯餅會。添丁真不愧盧仝。

由化州至石城道中作二首

山光染出翠陰稠。處處秧針繡綠疇。誰向桃花林下住。一溪春草飯耕牛。枝間臃腫波羅蜜。盆裏杈枒鐵海棠。獨坐無人山鳥散。蟬聲隔樹噪斜陽。

由龍灣至清坪作

日漸炎雲逼。天兼瘴霧拖。山荒春樹少。海近大風多。看竹皆吹籜。聽禽半插禾。籃輿一睡足。已失醉顏酡。

廉雷道中望海

地勢遙環島。天痕俯接瀾。颶吹山欲倒。海煮水疑乾。易林海老水乾。似鷁身將退。如鵬翼竟搏。瓊州何處是。雲霧總瀾漫。

橫山

路轉橫山又一村。清溪曲曲抱柴門。烟開柳港添新綠。雨滿秧田失舊痕。人立樹陰看犢臥。天穿葉隙見

鴉翻豐年光景深堪慰。更得書聲出短垣。

四月初九日渡海

地盡天南一海橫。茫茫四望水雲生。雨來先見龍孫走。風過還聞鷗母行。萬國朝宗番舶至。百靈護衛使舟平。要知鐵網扶桑處。定有珊瑚樹早成。

瓊山試畢示李琦符家麟二生

海南得二士。李琦符家麟。麟貌如玉樹。語微雜澆淳。琦面如顰麋。吐屬皆蘭芬。我持白玉尺。觀風駐海濱。波濤盪日月。奇氣吞鼉鯨。火樹然珊瑚。珠璣生蛟蜃。固宜有碩彥。以充鐵網珍。聖朝鴻造士。雨露遐邇均。得此喜不寐。渾忘航海辛。其餘非無採。葑菲難概論。薰陸與旃檀。何足挂齒唇。嘉木在培養。培養木乃春。奇寶在拂拭。拂拭光益新。還當策二子。名者實之賓。

謁洞酌泉蘇文忠公祠與諸生分韻得發字

誰謂雙泉甘。論自蘇公發。味泉兼濟詩。萬古兩清冽。我忝蜀後進。奉使遍百粵。於惠復於瓊。遺踪幸未歿。每到輒題詩。餘風肯令歇。譬如事先生。步趨戒勿越。倘隨六君子。未知指可屈。今晨出瓊東。石像領生謁。烹茶更分韻。不成例當罰。惜未祀陸公。亭名所由乞。序言。太守承議郎陸公求亭名與詩。故云。

將至遂溪十里山有小菴偶憩見壁上有任兆麓詩二首頗佳因和其韻

山路鐵雙峽。禪房瓦兩層。熱同蒸餛飩。客喜遇放刀僧。僧由營卒出家。已覺心無暑。何須手握冰。寥寥不數

語又可續傳燈。

何期小嶺上。轉有大溪聲。菴毀還題字。山低不問名。烹茶聽蟹眼。行李候雞鳴。安得同鄉令。同來話夙因。邑宰亦蜀人。

題石城明府喻黎川寶忠同年雨賜亭

我昔過此亭。空梁欲吹倒。今復過此亭。畫棟都完好。賢侯愛民如嬰雛。得雨甚於玉與珠。不信試看綠雲匝。四郊鋪出豐年圖。我與賢侯文章友。吏治能追玉局叟。喜雨亭繼雨賜亭。兩俱不愧民父母。池塘如鏡寫魚鱗。幾回秋去幾回春。獨有此亭能萬古。青山閱盡往來人。

高廉觀察奇麗川署中招飲席上有贈

深山那復有鶯聲。乍見依人小鳥靈。楊柳作腰偏裊裊。芙蓉如面竟亭亭。身輕爲有風前舞。韻細還宜月下聽。覆額粧殘螺黛盡。遠山猶剩一痕青。

懷奇麗川豐額題熱水池壁間欲麗川來此見也

一竈溫泉又挂筇。溪雲疊疊寺門封。萬山只隔高廉路。回首斜陽樹萬重。腰折一壺渾不俗。身輕三沐漸無災。題詩寄與賢觀察。贏得平身受拜回。予別麗川時適病腰。不能答拜。故云。

題嶺石巖

礪石何巉絕。攀躋特一來。山從平地起。洞向半天開。佛座烟霞護。仙鬟霧雨霏。何人吹鐵簾。直上唱歌臺。相傳劉女成仙於此。旁有唱歌臺。

新興道中見陳生潞來謁

山重溪複入雲深。疊疊風帆出樹林。驟雨欲來平野黑。斜陽欲下半山陰。羊城乍隔思親目。鳥道高懸憶子心。正是捲簾孤寂坐。盈盈一水見青衿。

題海珠菴

臨流欲賦詩。偶向盤石坐。灘急萬魚橫。溪深一鳥過。清陰不知寒。綠淨亦可唾。忽驚鏡面中。照見我一箇。八月初一日送臬司梁心石數書赴湖北藩司之任

九重初錫楚藩宣。百越風高擁畫船。魚鑰久肩籌餉重。熊疆新見事專權。風清月朗懷中聖。粵臬署與學署比隣。嘗約牆頭過濁。漢廣江深見政賢。黃鶴樓前倘相憶。一輪皓魄共心圓。

和提戎章書亭紳見贈青田石元韻

羨君鬢髮如鶴。凜凜霜髯秋不落。羨君勲業同樓船。浩浩氣魄高凌烟。昨於羊城親丰標。光風霽月浮雲消。竭來鵝城相促膝。酒闌燈燭語未歇。四壁圖書何爛斑。觸手琳琅皆青田。知君虎帳兼文事。不特龍韜空武備。從來宦味皆皮毛。誰肯豁露胷中豪。要知報國凌雲氣。十年洋海靜無事。捲君青田珍行囊。何時追琢逢元章。

和觀察陳絅齋繩祖獨遊白雲蒲澗寺至廉泉寺觀梅原韻

鎖院深嚴長閉門。天寒濁酒聊相溫。邇來對花忽不懌。看山竟欲隨山猿。蒲澗之寺在咫尺。望中似有林鴉翻。二年不至真自俗。豈果高擁居輜軒。昨者小輿纔命駕。蠻語參軍來相援。爲指磴確折屐齒。又言山荒似太始。無邊清興爲索然。但見烟霞互蒼紫。我聞寺爲仙人宅。頗有奇藥名不死。秦皇學仙固可笑。赤松弗遊亦堪恥。不採菖蒲花九節。十年槁木何由起。若有美人林下來。未得溯洄隔秋水。豈意耳畔聞濺濺。乃是詩人思湧泉。三日不見陳驚坐。便有秋江筆底懸。爲言寺在白雲邊。磬聲延客清且圓。紅蕉青荔映菴外。窗中時有僧談禪。更爲抵掌說奇事。晴天亂雪鋪茵氈。穿林一片黃昏日。暗香時向衣袂傳。鄧尉梅花三十里。相較何曾值一錢。我聞梅開子之半。何以仲冬如殘年。葭灰未飛春已動。得毋嶺外陽多愆。前身林逋卽君是。定有白鶴招山巔。月下美人夙緣在。供君寵玩如爭妍。不然何以獨身往。絕少俗孽來相纏。羅浮尙自付夢寐。人境不到安論仙。五羊城中十日雨。海底蛟龍朝水府。舟行江上易爲詩。和成倚枕方三鼓。君不見東坡夜讀阿房賦。老兵敢言不敢怒。

東安王明府送石屏四座二首

蒲帆一路看青山。半爲烟霞薄薄瞓。卻得東安賢太守。分來四片好峯巒。誅求到石未爲廉。多謝神君送兩擔。試問虬髯無恙否。點頭頑石亦掀髯。石作虬髯狀。王君多髯。故云。

舟發珠江將試韶州和陳絅齋繩祖送別韻

扁舟南海發。一片水天明。屢警鯨鼉色。長思鴛鴦情。三杯燒短燭。五字見長城。若論誰詩伯。輸君最有聲。

雨過峽山寺二首

輕舟入中宿。勝境一何清。溪樹風多響。山花夜自明。廟荒饑虎下。灘急牯牛橫。遙憶松門老。高吟和鐸聲。

春事今年早。山山發嫩黃。氣蒸榕葉換。風暖蘋苗香。撥刺魚跳急。鉤輶鳥語忙。炎州真異俗。一雨便添裳。

自雄至韶追送觀察李隨軒廷揚入覲

百里風帆似有神。平明已至曲江津。行裝載道猶遲我。餞館臨江已簇人。二月春波扶桂楫。五年溫語對楓宸。旗亭不是多惆悵。百粵惟君誼最親。

吳澹圃題太守新建白鶴峯新亭是日方試府學諸生童咸在遂命以東坡移居詩起句林行婆家初閉戶分韻爲詩擬作婆字韻一首

令威化鶴竟如何。蘇老風流迴不磨。朱閣喜看連堞起。青山依舊隔江多。雨風似認朝雲偶。富貴真同春夢婆。拔薤從來賢守政。循聲先聽泮林歌。

通衢在龍川縣南五十里

數家烟火小橋西。穠樾平疇翠剡齊。雨後菜花蝴蝶鬧。夕陽村落鷓鴣啼。二三健婦頭蒙帕。八十衰翁手拄藜。卻憶一封朝奏客。如何不共樂昌題。

惠州新試院落成兼賀澹圃

凌雲棘署絕羈塵。畫檻朱欄結構新。月桂定多攀折客。風簷俱是過來人。三年矢志金沙揀。十日華居酒盞頻。聞道蘇公遺教在。西湖定少暴腮鱗。

由棲禪寺至白鶴峯望江上諸山

青山無數入江雲。一一螺峯裊篆紋。壁立如人森萬笏。潮來似馬赴千軍。絕無隣舍青尊酌。也有人家白袂裙。最是獨遊岑寂甚。梵聲相答雨中聞。

連日雨漲由惠州一日至廣州

三載軒車屈曰歸。心旌已自駛如飛。舟行近岸方知速。雨霽濃雲漸覺稀。綠樹青山俱過眼。蠻烟瘴霧尙沾衣。最憐一事輸蘇老。三百離支與願違。在粵三載。所至輒與荔枝相左。

重九招主考中允王蔭臺仲愚吏部陳簡亭大文遊光孝寺命新解元順德張芍房錦芳新舉人東

莞劉翼如輔元庾粵峯泰均增成洪東塘祖貴咸陪分韻得詩字四絕句

黃菊尙無信。重陽應把卮。炎方秋不到。天使例留詩。
光孝榕陰滿。文宗羽蓋遲。三年兩讀畫。惟欠貫休詩。寺有唐貫休畫羅漢二軸真蹟。于是日再觀。
髮塔菩提葉。蛟綃織作絲。不堪持贈客。只可寫新詩。
人是駕行舊。天逢雁過時。今朝應爛醉。金谷不因詩。

輓兄寅工變元

兩載墳簾頓永離。十行老淚不勝垂。人稱醇士真無忝。天折貧儒亦太奇。扶輓最憐分道日。同堂猶記讀書時。刮毛龜背何有。聊檢清囊寄兩兒。

放猿并序

猿自高州攜來。養之學署。已三年矣。遍體純黑。性極慧黠。通臂善緣。能半空轉。不喜著地。非荔不食。今任滿回京。舟過峽山。因繫詩於項放之。

嘯咏相從已二年。野賓忽去轉淒然。預知過嶺難尋荔。故遣攀巖任飲泉。喜暖爲生南海地。畏寒豈慣北風天。此山舊有歸猿洞。遂伴追隨好聽禪。

黎冒遇觀察李隨軒延揚回任舟中話別

一江燈火使君船。道是隨軒問果然。淹雅昔原推陸疏。簡刑今尙說桓宣。廣東中丞又川李公。誅番禺。塘巨盜百八十人。君每多力爭。魚龍出窟聽詩句。鳥鵲移枝避別筵。直到啓明星始去。萬山回首但雲烟。

過英德縣

看盡山奇與水奇。舟行那怪泝流遲。灘聲似雨前頭響。巖影如雲撲面垂。尙喜激無孫子礪。不妨拜學米顛癡。英州處處堪留戀。獨有南山未忍離。

廬江夜泛

天水相連星斗明。奇哉此景恰三更。帆迴山背風無力。櫓翦江心月有聲。浦際遙聞人喚渡。城邊早見吏

來迎。何方乞得徐熙筆。畫我今宵再泛瀛。

恭祝萬壽一百韻謹序

乾隆庚子八月聖節。廣東學政臣李調元恭進。洪維我皇上紹統乘符。循璣立象。顯清輝於斗極。受靈筴於泰元。尺五雲霄。雀獻昭華之琯。大千世界。龍呈宛委之書。固已月晷含祥。乾維效氣。塵清九服。臥銅鼓於戎亨。瑞卜三登。耀金船於靈沼。茲屆上章之歲。適逢聖壽之期。香動蓂階。榮生桂闕。黃輝煥彩。捧來五色之雲。紫玉摘英。鑄出長生之字。合圖書者數千百所。敷文德者四十五年。分衽席以同春。盡綸裳而稟朔。而且七戎奏捷。矢落天狼。四庫搜奇。字釐帝虎。鑿空萬里。秋生苜蓿之風。採錄百家。香動蒲萄之錦。武功彪炳。文治光華。旣庶事之咸康。斯一人之有慶。加以詳求民隱。懋復時巡。飛芝蓋於南天。啓紺轅於北闕。平連齊魯。河聲嶽色之間。時協雨風。萑葉杏花之外。幾程綠水。箔是琉璃。一路青山。圖開金碧。然而睿慮方殷於澤國。宸遊豈玩夫物華。燭白壁以沉河。駐翠華而望海。蛟龍氣靜。不馳竹箭之流。鳥兔光清。常見扶桑之樹。無憂蟻孔。金隄則虹互一條。齊作魚鱗。石鍵則雲連百里。况乃恩敷赤縣。膏被蒼生。木鳳銜書。芝泥九莖之露。金雞赦草蘇三日之霖。暢士氣於槐宮。扇芳草於苹野。青旂蒞止。不費酒漿。幘髮來迎。報之蜜麪。揚壽考作人之化。道穆垂裳。聽康衢順則之謠。風馴擊壤。維帝包元而履德。維天隕祉而發祥。是以波動榮光。山傳靈響。千官劍佩。遙承吉慶之花。萬國衣冠。共譜昇平之曲。神符太乙。合東西南朔以

清寧星燦長庚。並日月岡陵而綿固。生聖人有道之世。仰企龍飛。誦天子萬年之章。願爲虎拜。敬陳篇什。用代賡歌。其詞曰。

海屋添春早。璇圖啓運長。芸生思就日。聖主正當陽。五色雲霞氣。三千鷁鷺行。應時調玉燭。隨地固金湯。上瑞文呈赤。長生籙衍蒼。一人恭作肅。萬歲壽而康。持敬恭無間。乘乾體自強。心傳綿舜禹。治理契陶唐。日月鑄圭璧。山龍補袞裳。德輝昭黼座。神藻挾天章。喜氣賡歌會。雍容翰墨場。睿懷通造化。奎璧接文昌。細帙輝金苑。瑤篇陋柏梁。精華搜四庫。遺帙採殊方。宿火青藜杖。春風芍藥香。訂訛如掃葉。去穢類排糠。衛客釐三豕。將軍辨四羊。校讐多士苑。陶鑄自吾皇。萬有歸包孕。諸家盡括囊。奇書叅夏鼎。善本聚春坊。共仰斯文盛。遐思我武揚。穴焚金嶺螳。臂斷雪山螳。每見三驥獲。寧容貳負藏。王師皆虎視。戰馬盡龍驤。地闢千重譯。途盤九曲腸。蠻雲寒苜蓿。劍氣掃櫓槍。雨洗碣樓淨。花吹茄寨香。頻年勞廟算。大凱脫戎裝。敷德陳干羽。成功息斧戕。有威相格被。無國不梯航。猶以東南重。兼之黎庶康。練時諮太史。建旄命司常。佩璫何曾費。耕漁絕不妨。五巡繩祖武。千里達康莊。齊魯同門戶。江湖入混茫。嵐低浮翠葆。岸迴泛沙棠。虹影爲橋待。龍身夾艦翔。吳頭還楚尾。隋苑又錢塘。峯是芙蓉掌。泉真瑪瑙漿。玉壺冰一片。瓊宇水中央。出豈緣游豫。行彌肅紀綱。帷宮閑棹楫。林殿不珠璫。尙儉師三古。求瘼凜七襄。天顏瞻咫尺。民隱廬巖廊。時也方芸耔。羣焉立井疆。田知無草宅。物驗厥心臧。綺羅新肥麥。芳塍漸插秧。幽風兼草木。農話只耕桑。帝省恩無極。宸遊樂未遑。江南波正綠。河北浪全黃。念昨桃花漲。深籌竹槌防。自從經翠蓋。乍見發榮光。

祀典金繩蕭靈颺玉節。颺無煩歌瓠子。不復決宣房。蘭采看神授。松舟可葦航。安茲四瀆長。視彼百川王。凡水皆歸壑。惟民切望洋。海濱勞鳳輦。天策奠龍堂。鞏固魚鱗勢。平安佔客樁。利興斯絕害。德茂乃凝祥。本是皇仁普。翻令帝力忘。好風隨律轉。遲日以時暘。人在羲皇世。居皆廉讓鄉。可云咸得所。猶且視如傷。頻減丁年賦。重蠲甲戶糧。雞竿銜雨露。犴戶靜銀鐙。網直開三面。膏先徧八荒。牲醪酬壽耆。棹楔慰嫠嫗。起廢無鐫秩。行廩有宿梁。朱提頒內府。紅粟出神倉。豐阜時堪驗。文明象益彰。萃蒿原飼鹿。梧竹合棲鳳。多士收南國。羣才廣上庠。天人追董子。南雅顯毛萇。辛苦三條燭。艱難兩鬢霜。寸心垂老壯。一第特恩償。浩蕩波同渥。昭回日有芒。厥聲威月竊。至教被河湟。星斗聯冠冕。江淮達篚筐。塗山玉帛盛。虞陛股肱良。鳳翥鸞鸞外。爐烟扇影旁。琴風能解慍。冀露欲流芳。地瑞銀呈甕。天文斗戴匡。真形圖五嶽。和響戛雙璫。路卽蓬萊島。山稱靈壽岡。升恆綿厥算。金玉作其相。寰海昇平慶。綸言典誥煌。樓臺涵翡翠。歌詠比鴛鴦。聲聽尙書履。茵連御史牀。傾心慕葵藿。特達顯圭璋。書獻千秋鏡。春生百福觴。臣羹和鼎鼐。主誼洽笙簧。賜醴霞爲液。分鮮肉截肪。紅雲凝朵朵。仙樂奏鏘鏘。天上聞簫管。花間換羽商。菲才慚短綆。賦手愧長楊。每以冰心矢。頻叨玉尺量。螭坳懷肅穆。虎拜憶趨跄。午陞宸旒煥。寅階黼黻張。光華占復旦。瑞氣滿天閭。

辛丑

早發通州至九松山寺和崔大司寇應增壁上韻

橋南小寺偶停蹤。嘯傲居然膝可容。春以綠陰歸萬柳。大將青色染諸峯。百年不老堦前石。萬里長思屋後松。莫道遺民半非舊。癯僧雖老尙能筇。

觀音菴在古北口外兩間房

關門初出客程兼。四月垂楊綠漸添。瀑布雨餘穿石罅。邊牆雲裏走峯尖。兩間房小何妨憩。一盞茶粗已覺甜。農事正忙僧未返。佛龕拋卻破楞嚴。

度紅石喇梁口外呼嶺曰梁

屋簷一嶺互虹霓。回望南天疊嶂西。日落行人千蟻上。雲開立馬萬峯低。薄裘不禁風聲刮。村屋多疑雨色迷。記得去年梅嶺路。依稀只少鷓鴣啼。

黃土梁

翠巘迎人路百灣。一重山矮一重山。漫言春色堂堂去。開遍桃花四月間。

西柳溝

水細不成河。山遙漸作坡。民居依樹密。驛路傍溝多。魯酒甘如醴。居民多山東人流寓。吳棉薄似羅。是日頗寒。喜聞王化遠。到處有絃歌。

題金氏館

松蘿一徑下遙岑。雲外幽居愜素心。瓦雀時翻窗外影。瓏牛閒臥樹中陰。麥因雪凍芽方茁。柳爲風搜葉

未深。一碗茶甘留舌本。新詩寫就自長吟。

自平泉赴建昌原名塔子溝新改爲縣

撲面狂風未禁當。廉纖小雨點平岡。山無向背隨人轉。路有高低仗馬強。樹聳鐘樓知寺近。桃開野店覺村香。不須抖擻衣塵盡。准擬歸時十斛量。

平泉州原名巴溝新改爲州

細脈何年洩。泉名冠一州。湧來雖杓突。瀉處總平流。不井千村飲。非田萬頃收。昨宵風雨猛。疑是老龍湫。

雙廟店壁題通州糧船圖

誰將尺幅寫通州。城郭樓船眼底收。此日關心催運急。風沙千里尙巴溝。

渡大凌河

問渡大凌河。風聲滿樹柯。天連沙磧遠。水入亂山多。苦霧蒼蒼合。流雲淦淦過。不知遷土客。鄉思竟如何。

木頭城

萬鴉盤陣處。搖指木頭城。人雜牛羊氣。山多虎豹聲。家家番字幟。寺寺梵文旌。莫謂邊風惡。香醪異樣清。

雨駐朝陽縣題釋照鉢山水畫

一幅青山綠水圖。居然筆意近黃蘇。不知絕頂松根寺。可有番僧得到無。

瓦房